

## lis Gnovis

## ■ UDIN. Messe par furlan

A Udin, la Messe par furlan e ven cjantade sabide ai 20 di Zenâr aes 5 e mieze sore sere, li de capele «de Purità», daprûf dal domo (cun Radio Spazio che le trasmet sul moment). Al compagnarà la celebrazion il Còr di Rivarote e Durlasse. Al cjantarà messe pre Dario Franco.

## ■ TUMIEÇ. Si presente il Strolc furlan 2024

Il volumut cui bogns auspiciis pal 2024, rivât ae edizion numar 105 e metût adun di Dani Pagnucco, al compagnarà i letôrs cun contis, poesii e rubrichis scritis tes diversis varietâts dal furlan. La novitât di cheste edizion e je la rubriche "Linda Cjargneta", che e presente i contribûts, tes lôr variants locals, di dodis autôrs de Cjargne: Elia Ferigo, Elsa Martin, Giacomo Bonanni, Lucia Protto, Manuela Quaglia, Paolo Roseano, Velia Plozner, Tita De Stales, Bruno Mongiat, Pieri Pinçan, Novella Del Fabbro e Celestino Vezzi. Il Strolc 2024 al proferis mès par mès une bieleschirie di flôrs che a cressin inte nestre region: cutuadis specis fotografadis di Serena Chiapolino, cjargnele di Çurçuvint, e descritis di Alberto Candolini, sieltis fra lis cirche trê mil e cincent che o vin sul nestri teritori: no dome la montagne ma anje lis risultivis, i magrêts de Celine-Midune, il Cjars. Il Strolc al rive a Tumieç dulà che, in graciis de colaborazion e de ospitalitât de Biblioteche Civiche, al sarà presentât ai 18 di Zenâr dal 2024 aes 5.30 dopomisdì di Dani Pagnucco e Celestino Vezzi dutune cun cualchi autôr cjargnel che al darà vòs ai siei scrits.

## ■ FRIÛL-VJ. A cressin i incidents su lis stradis nostranis

Secont la elaborazion dai dàts rilevâts dal Istat, il numar dai incidents, tal 2022, su lis nestris stradis al è cressût, a pet dal an prime, dal 9,9%, rivant a 3.265 incidents sucedûts su la viabilitât regionâl. Se o fasin une sorte di (triste) graduatorie, la nestre region e ocupe il diesim tierç puest in Italie. Ma se o passin dal numar total a chel riferit al numar dai abitants, si cjatin al otâf puest, cun 273,4 incidents par ogni 100 mil abitants, cu la provincie di Udin al prin puest in region, par numar di incidents, che a 'ndi son stâts contâts 1.182. In relazion ae popolazion il primât al spiete a Triest cun 422,8 incidents par 100 mil abitants. Numars di fâ pôre, parcè che daûr di lôr a stan tancj muarts e tancj ferîts. Cundut che si predicje (ma si viôt che no dome chês in glesie si stan pôc a sintî), lis causis de plui part dai incidents a son simpri chês: disatenzion, mancjade osservance de segnaletiche che si cognòs pôc o nuie, presse, telefonin ae vuide... E zontin anje il stât di salût des stradis, che culi di nô al è avonde bon, anje se a scomencin a comparî certis busis...

## ■ JAVAÇ. O LÂC O PALÛT?

La lote infinide pe aghe

Chei dal Comitât pe tutele des aghis dal bacin dal Tiliment e chei dal Comitât pe difese e valorizazion dal lâc di Cjavaç a àn dit un clâr "no" al projet di derivazion dal scaric dal lâc dal Consorzi di bonifiche de planure furlane, che al è costât 50 mil euros ae Amministrazion regionâl. I representants dai doi Comitâts a disin di vê vude la impression che la Region, daspò di vê metût di bande i elaborâts produsûts dal "laboratorio del lago" tal 2019, par vie che a vevin individuât trê variants di "bypass", e vebi incaricât un Studi piemontês par fâ cuintri ae ipotesi dal "bypass" e tutelâ i interès de societât A2A e dal Consorzi, mascarant la operazion cun intervents che a laressin cuintri chel che al proviôt il Plan regionâl di tutele des aghis, ven a stâi il "bypass". E a ricuardin che plui studis a àn metût in vuaita dal pericol che, par vie de sedimentazion dai scarics de centrâl, tra cualchi an il lâc al podarès diventâ une paluderie.

Miercus 17 S. Antoni abât

Joibe 18 S. te Prische martare

Vinars 19 S. Mari martar

Sabide 20 S. ts Bastian e Fabian

Domenie 21 III Domenie vie pal an

Lunis 22 S. Vincenz diacon

Martars 23 S. te Merenziane v.

Il timp Temperadure che si sbasse



**Il soreli**  
Ai 17 al jeve aes 7.44  
e al va a mont aes 16.50.



**La lune**  
Ai 18 Prin cuart

**Il proverbi**  
Sant Antoni, il frêt al va di conî.

**Lis voris dal mès**

Nol è tant ce fâ tal prin mès dal an: il teren al è inmò glaçât e fûr il frêt al è crût. Par intant, o podês gjavâ vie fueis muartis, jerbatis e claps.

# Il prin "seminarium" de cristianitât aquileiese

*Tal IV secul d.d.C la diocesi di Aquilee e jere diventade un dai centris plui vivarôs de cristianitât di chei agns. Propit culi il vescul Valerian al ideà e al organizà il Seminarium di Aquilee, cun chê di meti adun fede e culture, metint adun zovins braurôs par curâ la lôr formazion scientifiche e pratiche, di mût di ufrî ae Glesie predicjadôrs valents e interpretis fedêi des scrituris. Ma al fo il vescul Eusebi, vescul di Vercelli, plui tart, che a 'ndi svilupà la organizazion, massime par chel che al inten la formazion teologjiche e leterarie metint in vore, intant, l'ideâl di vite assetiche promovût di Martin di Tours tal munistîr di Marmoutier. E Cromazi, arlêf di Valerian, jentrât cul fradi Eusebi tal Seminarium come prefet, al diventà une sorte di diretôr di cheste istituzion, che al gjoldeve di grande stime anje di sant Jeroni, che lu veve plui voltis clamât "doctissime Episcoporum". Propit sant Jeroni al fo un dai plui innomenâts frequentadôrs, anje se par pôc timp, dal Seminarium, cuant che tor dal 371 al rivâ a Aquilee, forsît clamât dal amî Rufin, par ritirâsi cun altris di lôr tal munistîr par dedicâsi al studi de dotrine cristiane, restant simpri in contat cun lôr, fale che cun Rufin, che si*



Il vescul Valerian

**Il Seminarium al voleve promovi un clericât che al fos ben istruît te dotrine, di mût di fâ front aes eresiis che si slargjavin tal teritori de grande diocesi di Aquilee**

cjatà in rotis par vie di une fuarte dispute su Origene. Tancj scritôrs e vescui a jessaran dal Seminarium, come Eusebi, vescul di Bologne, e Eliodoro di Altin. Dopo la muart di Cromazi, ben planc, il Seminarium al scomençà a pierdi di impuartance, sedi par vie des vueris che pe mancjance di personaç di innomine che a 'ndi cjapassin la direzion, ma anje par vie che intant tai teritoris de diocesi si stave slargjant la eresia dal munic Pelagj. Al sostignive che la colpe dal pecjât originâl e jere dome dai nestris progenitôrs, ma anje chê ariane, che i vescui di Aquilee a

scombatevin cun fuarce. Cundut achel, il spirt e l'incei dal Seminarium si jerin slargjâts massime par vie dai arlêfs che a 'ndi vevin supâts i valôrs e che daspò ju proponevin tai ambients dulà che a vivevin. E di fat Crisolic, vescul di Ravene, tai siei Sermones, nus fâs capî di vê metût sù in chê citât une scuele come chê di Aquilee. Diferent dai munistîrs orientâls, che i lôr membrs si dedicavin a une vite dute assetiche, cence nissun rapuart cul mont di fûr, il Seminarium di Aquilee al voleve promovi un clericât che al fos ben istruît te dotrine, di mût di fâ front aes eresiis che si slargjavin tal teritori de grande diocesi di Aquilee. Par tant, i membrs dal Seminarium a formavin anje une vere e proprie comunitât di lavôr al servizi de Glesie, che i siei components a varessin continuât chel rapuart anje daspò te lôr ativitât di singui, sul teritori. Ma dulà saressial stât il munistîr li che si cjatave il Seminarium? Ae fin dal '800 tal edifici di une aziende agricole, in localitât Munistîr, al fo scuviert un bocon di une costruzion antighe cuntun mosaic paleocristian, conferit a une des glesiis plui antighis di Aquilee, e tal 1933/34 il prof. Brusin al puartâ ae lûs il pavimento di dute la basiliche di Aquilee. A son i rescj di une grandiose basiliche che nus pandin un document sigûr de esistence, tal lûc, di une vivarose ativitât intelektuâl di chel mont antic: e forsît propit culi si cjatave il munistîr, la sede dal Seminarium di Aquilee.

Roberto Iacovissi

## Tradizions furlanis dal mès par cure di Mario Martinis

### SANT ANTONI ABÂT

Ai 17 di zenâr il calendari liturgjic al fiesteze Sant Antoni, un eremite dal desert che cul lâ dai secui al à cjapât sù lis funziions di purificazion che a vignivin fatis de civiltât romane e po passadis ae tradizion cristiane tal so solit e inteligent sincretisim rituâl. Cussì fin ai agns Sessante dal Nûfcent tai pais de Basse furlane li che la tradizion si è mantignude plui a dilunc, te buinore de fieste di Sant Antoni, dopo la messe a vignivin benedidis lis bestiis de stale e dal curtîl, cussì necessariis pes voris e il sostentament de popolazion rurâl dal passât. Tal calendari populâr la fieste di Sant Antoni abât e jere anje date-suee e date di avis stagjonâl (cuant che dutis lis scortis de famee a vevin di jessi consumadis par metât) che e segnave un altri grât di cressite dal soreli tal firmament e il slungjâsi des zornadis che 'ndi derivave. In ultin, di ricurdâ che ai 17 di zenâr fin a cualchi desene di agns indaûr, simpri te Basse furlane, si impiavin altris fûcs,



che cun ogni probabilitât si indreçavin simpri al antic caratar lustrâl de fieste o ae plui largje tradizion europeane di impiâ fûcs tai moments di fonde de grande ruede dal an. Cuasi in ducj i pais dal Friûl e jere la tradizion che la Glesie o lis confraternitis a fasessin benedî un o doi purcitus dopo la messe dal sant par po lassâju libars fin al unvier dopo. In chest timp lis bestiis si presentavin devant dai portons e des puartis des cjasis e a spietavin che i contadins ju nudrissin. I purcitus a jerin ricognossûts parcè che su la schene e jere stade piturade une crôs, o ben parcè che il pèl su la grope al jere stât rasât in maniere che e vignis fûr la scrite S. A. (Sant Antoni). Lis bestiis a jerin rispjetadis di ducj e nissun nol olsave no dâur alc di mangjâ o tratâju mâl. Cuant che tal tart autun lôr a jerin rivâts ae taie juste, a vignivin metûts a la aste e cun chel che si vuadagnave si viodeve des necessitâts dal predi o de glesie e des oparis religjosis.